

Le Pelong



AFRICA
PL
8747
.4
ROB

Ludo Robert

Le Pelong

Ludo Robert



Hodder & Stoughton

A MEMBER OF THE HODDER HEADLINE GROUP

GABORONE JOHANNESBURG LONDON SYDNEY AUCKLAND

First published in 1999 by
Hodder & Stoughton Educational
Botswana (Pty) Ltd
A division of Hodder Headline PLC
PO Box 60782
Gaborone
Botswana



80420873

© Ludo Robert

ISBN 99912-90-26-5

Printed by Pinetown Printers (Pty) Ltd. 16 Ivy Road, Pinetown 3600

Typesetting and design by Marna Schoeman

Cover illustration by Keeme Mosinyi

Cover design by Marna Schoeman



All rights reserved. No part of this publication may be reproduced or transmitted in any form or by any means, electronic or mechanical, including photocopy, recording, or any information storage and retrieval system, without permission in writing from the publisher.

DITENG

Ditebogo	1
Ketapele	1
Leswe	2
Pula	4
Motloutse	6
Bojang	8
Setlhare Sa Mophane	9
Makgabisa Naga	10
Botswana	11
Ke Raletse Botswana	13
Motse Mogolo Mošate	14
Mapharangwane	16
Leina	17
Bodiba jo bo jeleng Ngwana wa ga Mmago	19
Meno Masweu	20
Dikeletso	21
Lorato	22
Bohumi	23
Bana	24
Molelo	26
Madi	27
Ntlo	28
Tlatlana	29
Mosokelatsebeng	30
Dikhwaere	31
Magapu	32
Phane	33
Koko	34
Mmangolwana	35
Katse	37
Re Latlhegetswe	39
Philip Mokgankgara Moshotle	40
Seretse A Goroga A Tswa Moseja	41
Babirwa	42
Mama	44



DITEBOGO

Motswana o rile mabogo dinku a thebana, ka jalo ke lebo-ga botlhe ba ba tsentseng letsogo gore buka e e atlege. Segolo bogolo ke rata ke rorela rre hutshe, ene ke R. I. Mhaladi. Ke leboga thata le bonnake ebong Agnes Nkoketsang le Olebogeng D Robert. Ke leboga le ditsala tsame tsa popota tse di nthotoeditseng go fitlha fa ebong C. Serame le G. Phutego. Ga ke batle go lebala M. T. Maedza le M. Motshegwa ba ba nkemeng nokeng nako youtlhe go fitlha buka e e kwalwa.

KETAPELE

Bana ba tlhari e ntsho, ke bona go tshwanela go re ka jaana ngwao ya rona e ya ga maoto hunyela, ke intshe maswe dinaleng ke kwale maboko gore ke leke go humisa puo ya rona. Fa go leng maswe teng, ka re a ke inelwe diatla metsing. Kana gatwe “wa ngwana ga o tlhotshwe ditlhokwa”, ka jalo a e nne modiga, kana puo e ya bor-raarona-mogolo e bofitlha segolo jang ka e le maiteko a ntlha. Maiteko ga se lefela.

Ludo Robert o tlolega kwa kgotleng ya ga Mogapi kwa Bobonong. O tshotswe ka 1974, teng kwa Bobonong. O tsene sekolo se se botlana kwa Madikwe kwa Bobonong, a ya go feletsa kwa Mabolwe. Sekole se se golwane o se tsene kwa orapa, go tloga foo a ya go tsena kwa Letlhakane. O ne a ya go ithutela borutabana kwa mmadikolo wa Swasing. Ka nako ya buka e e kwalwa ke fa ele morutabana kwa sekolong sa Mowana kwa Mahalapye.



LESWE



Setšhaba sa Botswana se tlapile qiatla
Se digile magetla, se rwele mabogo ditlhogong
Digoagoe di kile tsa goagoetsa
Seromamowa le sone sa romela molaetsa
Mokwalo wa gaswagaswa le Botswana
Molaetsa one wa tlaela go fitlha go Botswana bagaetsho.

Mafatshe a sele a kile a kua mokgosi
Le gompieno ba ntse ba a kuakuetsa
Le fa go twe, "Mosekaphofu ya gaabo..."
• Bone ga ba ipone 'tsapa ka ya-a-bo mongwe
• Mme molaetsa ga o fitlhe go Botswana bagaetsho.

• Ditanka le mafelo a matlakala di tletse le lefatshe
• Matlwana a boitiketso a setšhaba a agilwe le ditoropo
• Kwa dikgaolong boutsana
• Le batho mo malwapeng ba midile dinala
• Bontsi bo ikantse go bontsha naga diphiri tsa bone
• Naga e bodile e sa kotangwa ke ntsi
• Fa moloi mminamitlweng a re jetse nala
• Monko o kgaola tshwene monyetsane
• Bommaboitekanelo ba dule mangana
• Mme molaetsa ga o fitlhe go Botswana bagaetsho.

Dikanti ke makgabisane a lefatshe
Tiro ya tsone Botswana re e itebaditse
Re gasagasa fela re di kekologa
Re ikapesitse moriti o tsididi
Bontsi re itswetse ditlhaloganyo
Re ipela re tlhama mmereko
Re ipona 'boclever,' re sa lemoge re ikgama ka kgole
Maokaneng o kile a tsenya lentswana
Mme molaetsa ga o fitlhe go Botswana bagaetsho.

Dikgwebo di apesitse lefatshe re a di bona
 Ya bojalwa e re apesitse kobo ka letshoba
 Boradikgwebo ba tlhomile matlwana a Bakgatla
 Bangwe banwi ruri masutlha
 Boatla jwa bone bo fatlha matlho
 Le ntša e ka gana go bo bogola
 Ga ba tshabe go rontsha ntlwana ditshwanelo
 Ba e pote kwa morago
 Ba nese pula ya medupi letsatsi le kua
 Le tlotlo ba e latlhile
 Ditlhare le mapako di lekile go ikuela ka go swa
 Mme molaetsa ga o fitlhe go Batswana багаetsho.

Mo dikgaolong boradibutšhara le bone ba tsentsa letsogo
 Ba re apeisa ka mothubana
 Ba dirile matlhabelo gareng ga mpa tsa metse
 E re ka go twe, tlhotlhora bopi o je kgetse
 Bopi bo re beile ka 'ntlha tsa marago
 Fa kgomo, tshwaana e tsetse,
 Dibete tsa rona di ema ka dinao.
 Mme molaetsa ga o fitlhe go Batswana багаetsho.



PULA

Loapi lo ne lo apere mosi o montsho
Badimo ba romomisa dikodu
Ba bangwe ba tla ba re tsaya le tsone dinepe
Modimo le one wa tsenya letsogo
Wa kgwela mathe kwano lefatsheng.

Ba re ke madiramaswe, madiramantle
Kotla masiela kotla bomphampha
Monna yo o reng a jele nala saka le humanege
Lefatshe lone le hutsege

Ngwaga wa sekete makgolo a robabongwe masome
Robabongwe le botlhano e rile a dumedisana
Ya na matsorotsoro ya tlhatswa matlapa mebala
Ya dira go tlala diatla kgomo e tshetlhana
E e reng e foloditse banna ba itshware mahutsana

E tsile ka mašetla tshabadira
Ya tshologa jaaka boupi mo kgetsing e e dutlang
Bana ba mmala wa letsoku ra sala re itshopere
Kgaolong tsa Phalapšwe, Mhalapšwe le Letlhakane ga nkg
go sa bola
Ya tshologa ka mabetwaepelo ya bolaya koko le motho

Mo dinokeng ga lela segogwane
Bo Lotsane le boOodi gone ga bopa letlametlo
Di eme rakeobokile e bile di ntsha ka tlhaa
Lotsane ene o tlogetse bomatsatsa ba sa ikatega
A ba tlogela fela jaaka ba tsile

Basadi fa go lengwa ba tsenya ditlhogo
Fa a mela ba tsenya magetla
Go roba gone ba tsenya mafatlha
Fa go phothwa gone ba tsenya dinoka le dinao
Masimo a bone pelega dirathana
Pelega bana ba se nang borraabo
Digoroga mmele ba a di rata
Mmangolwana le ene ba a mo pepetletsana

Tsebeditelele ene ba mo pega jokwe
Nama yone ke sejo segolo
E bo e patiwa ke mmamoswaana
Fa di bapile thelelabodiba.



MOTLOUTSE



Fa o ne o le ditsebe ditona
Motho o ka be a go kuelela
A re huree! swabi!
O ne o ikgantsha jaaka mokwepa o le mo maeng
O sita boreaitse le boreakgona.

Ngwaga ke ole o go tlhaeditse matlho
Le fa o ka ema ka nkoto
Wa gagamatsa ditshika
O bidiwa yo o paletsweng
Diga lenao re bone gotlhe
Re tsere botlhale ka kgetsi e tletse.

Borankhibidu ka ba itse go loga leloba
Ba itse go laya bana fa ba itaolela bagolo
Madiiso ba a dirile go go kopela molomo
Ba dira thaba e e kwa ga malome boreletsana
Bapagami ba yone ba iteba direthe.

Maoto a tlaa dika a go jela nala
Gore o se ke wa hutsega
Monongwaga re go lebelo kwa tlase
Setlhabelo sone e tlaa nna phitlhela kgomo ya serotswana
O tlaa se bona tlhale e fapogile tsela.

Monate ruri o o kgamotlhetse
Dikorokoro tsone o di gopetse
O ne o kgonwa ke mekoko
Namane tse ditona boke-a-kokomoga.

Mogang o petotse melomo go ne go nkgaga sebedu
Banna ba tseisana molelo le ramatheka
E le baagisani ba sa itsane
Banna ba iphetotse dikepe
Bangwe ba ipitsa boMmendi.

Bomadimabe ba boe ba itshopere
O ikeditse leruarua la dithoto
Banna ba re ba leka matshelo
Wa latola ka nnyaa wa banyana
Ba itse go lepeletsa diatla
O kare digwapa tsa kgomo ya leuba.





BOJANG

Kobo ya botsebeditelele
Moretlwa wa mmamphula ke ntse
Maselwa ke dinonyane tshotlhe
Borabiibii le boboragale tota
Bodiba jwa baratani le bailani
Legola la tshimo ya Leburu

Medimo-e-e-nko-e-metsi o fitlhela e goloketsa
Megolokwane o ka re ya bommemogolo ka letlhabula
Bommee; o fitlhela ba apere lefatshe
Ba tlhatswegile mebala
Ba rapa jaaka namane e e ja mokaragana.

Bonku diporompeta tsa bone di folosa magodimo
Dirota tsa bopoo o fitlhela di palamela seolo sa mabowa
Banna ba nna ba obega o kare mmopo
Fa tlase ga dinoka le melapo bontlenyane
Naga e apere masire a matalana
A kgabisitswe o kare phikoko ya gae.

Marole one a tika lešagwana
Kgatsele le maši di ela jaaka metsi a pula ya medupe
Maragwana a dipotsane borobe jwa mae
Goo-ra motho go jewa poko
Baruti bone ba letsa dikatara.

SETLHARE SA MOPHANE

Ke tsamaile naga ya gaetsho ke e lekola
Go lebaleba magola a ke sa ntse ke disa
Naga e kgabile sentle e ntse tala
Maungo a kolotla mo ditlhareng
Ke tla ke tlopolo bomogwana le bopholosa ya batlhoki
khibidu

E rile ke tlhaga ka sekgwa sa lephane
Ka ema ka bogela
Dikala di ntse dithamaga
Matlhare one a balwa ka menwana
Go lela letlhoa ka sethoboloko
Senyetse le sone se tseremela boatleng.

Ka tsena kwa lapeng ka kgwa sepšhwe
Monnamontsho a bo a emetse fa godimo
A kotame dikgong tsa mophane
Ka mo okomela kwa tlase ke sa mo roge
Ka fitlhela a ruile gano la tau
Mme a bo a ntse a topola magalapa a baya motshetshe

E rile bo o sa ka etela kwa kgotleng
Go botsa bagolo matsogo
Ka fitlhela maputswa a tsentse ditlhogo
Ka ema ka lorako ka isa bofofu
Namane tse ditona tsa bo di ntse di baakanya melao
Diatla tsone tsa bo di ganeletse kwa isong
Kgosi yone e le morena mophane.

Ka atamela ka dumedisa batlhabani ba molelo
Le nna ka itshukunyetsa fa gare ga borre
Ka apara kobo ya dikgosi
Ba nthoma morongwa kwa kgotleng
Gore ke nne ke kgotleletsa kgosi molelo
Ka molelo wa kgotla o sa tshwanela go tima.



MAKGABISA NAGA

Goora-Lenaga go a betlwa
Naga ya Botswana e apere mebala
Baratani le bailane ba jela ka mogopo o le mongwe
Fela bailane ba ja ka go dibosana

Di iteilwe ka mebala mentle
Bopitse e tilodi le botshephe
Fa di ikadile go a bogelwa
Di oka le batho ba mafatshe a sele tota

Makgabisa naga a tshoeditse itsholelo ya Batswana
A e rwele ka magetla oo mabedi
Le mebereko a a re e direla
Bajanala le bone balatlhela lentswana.
Ditlhako dibeke re a di roka
Manyena le one re a a rwala
E re ka Batswana e le barati ba nama
Le yone re a e kgaphutlha
Bangweng ba rona, ke yone konokono ya go ja.

BOTSWANA

Lefatshe la kgomo le maši
La diphologolo makgabisa naga
Temo ya mabele mabelega batho
Le teemane mmabatho, mma-Botswana.

Matlhabelo a tlhomilwe kwa Lobatse
Kwa Francistown le kwa Maun
Sebokolodi matsamaya a bobola o a kukuna
A rwala badimo ba Botswana
Go ba isa kwa ntlooaaro

Kwa E.E.C. ba a re tlotla
Ka re ba fepa ka nama, namola leuba
Re ba rekisetsa ya tse khunou
Le rona re rekele bana dibuka
Re bo re ba agele dikolo.

Mafatshe a mantsi a re meletsa mathe
Ka diphologolo makgabisa naga
Di ba bitsa ka bitsabitsa
Ba tle go re tshelela a a bolaileng Morena
Batlhoki ba rona ba itatswe menwana.

Batswana ba rata temo
Ba lemile le sešabane
Sa bofa bana mala
Mme segaolane ba se romele kwa tshilong
Batsetse ra ba fepa ka motogo

Kwa Orapa le Jwaneng ditoropo di runtse
Letlhakane le ene go bonwe teemane
Ya tsholetsa Botswana ya mo tlotlomatsa
Le Makgoa fa ba re bona ba itaya salutu
Kana le matlhatlaganyane re a agile.





Kwa Gaborone le boreaitse re a ba etsa
Re tthamile Hyundai ya tsala mawelana
Ya tshola Sonata le Elantra
Scoupe le Accent ra ba belega
Tsa kalafi le tsone ra di tlhokomela.

KE RALETSE BOTSWANA

Ke tsene Botswana ka Ramokgwebana ka fetoga mokgweba
Ka wela kwa Shashe ka tswa dišaše
Serule ka mo kekologa ka tsena ka Mmadinare ka ja nare
Kwa Selebi Phikwe ka aga sephikwe
Ka ralala Bobonong ka bona dilo
Lentswelemoriti ka nna moriti o tsididi
Ka wela ka Mashatu ka aga mošate

Ka ja lokekema ke sa lo fiwa
Machaneng ka tsena bo sele ka bona matšha
Mhalapšwe ka feta ke boroletse
Ka wela kwa Dibete ka wela dibete
Ka ipega kwa Kgatleng ka kgatlakgatla borekhu
Ka tsena kwa Gaborone ka tshwanelwa ke bogosi

Fa letsatsi le fifala ka kgabolela kwa Lobatse
Ka ralala Mmathethe, ka thetha
Kwa Sedibeng ka nwa metsi a petse
Ka ipega kwa Ramatlabama, ka re kgo!
Mo Kanye ka ikanya Bangwaketse
Ka feta ka Moshupa ka tsena ga Thamaga ka rua dithamaga
Kwa Molepolole ka lapologa

Fa ke fitlha kwa Letlhakeng ka kgetla letlhaka ka rulela ntlo
Ba mpone ke feta kwa Dutlwe ke ya kwa Tsetseng, ka fitl-
hela ntsi ya tsetse e tlhasetse dikgomo
Ka iphalotsa, ka wela ka Gantsi, ka leboga ga ntsi
Ba Sehitwa ba nkutlwaletse ka podi ya tsela
Maun ka goroga, ka ja maungo
Kwa Phuduhudu ka ja phuduhudu ke sa e tsoma

Ka kgabola kwa Rakopo, ka kopola
Kwa Mopipi ka fitlhela mopipi o bodule
Orapa ka mo ja lekekema
Ka wela kwa Letlhakane, ka tlhakana le Bahurutshe
Mmashoro le Paje ba mpone ke feta
Ka ipega mo Serowe, ka epa serowa
Kwa Morupule ka nwa phefo
Ka wela mo Palapšwe, ka letsa phala
Bokhutlo jwa mosepele ka huna maoto



MOTSEMOGOLO WA MOŠATE



Ke tsene teng letsatsi le tlhaba
Ka fatlhwa ke marang a letsatsi
A nkitsa go otlolola moetse
Le dikoloi tsa ba tsa batla go ntseela botshelo
Ka sitega ka ke ne ke sa rwala tlhoro
Di elela jaaka metsi a pula
Go se na le bobeo jwa lonao
Ka tsibikela jaaka motho wa tlala

Matlo kwa mošate a ikadile
Go eme botlhatlaganyane ba magasigasi
BoOrapa house le boPoso house ba eme dimapo
Dinogana tsone ke tse diphathswa fela
Fa marakenelong a tsone go benya dinaledi
E nngwe tshetlha, e nngwe khibidu, ya bofelo tala
Di batla boreaitse e seng bompaadiatla
Fa o ja dinala boreaitse ba ka go ja nko e sa butswa
Ka o ka ba gaila o sa tshwara tlhobolo.

Kgwebo le yone ke mmu
Le meriri ba itse go e tsoketsa
Tsa kapari le dijo di ka go kala matlho
Ke batlile ke fetoga legodu
Fa ke tlhaga fa mmarakeng
Ka fitlhela ba tshameka bolo ka lekau
Ke raya jentlelemanane
A ne a leka go ithusa ka sekgwama sa mosadi mongwe.

Ke fetile fa pele ga palamente ka eletsa
Ka batla ke kokota ke re dumelang
Ka latlhela bofufu ka bona ntša tsa mmuso
Di šenne meno o ka re phiri e tsenwe ke molafo
Mmadikolo le ene o runtse jaaka lebowa
Baruti le baithuti di ya thoteng
Ba benya jaaka ditshephe di ya go nwa
Mmakalafi le ene o tlhomilwe
Ke betlilwe ke monko wa molemo ke sa le kgakala
Ka ke le dibete di gaufi ka ja lekekema ka kgora

La bo le ile le le sekeng le tlhoka go dikela
Ga benya dinaledi tsa tswa bomonkgogi
Ka itaa mpeetšhane ka ba ka kgapha sethito
Naga ya fetoga sekaka sa Kgalagadi
Ka gamela ka e e leroba
Ka sala ke behile o kare nare e dupelela loso
Mpheetšhane a kgaoga ka salelwa ke kgole ya monwana.



MAPHARANGWANE



Nonyane tsa loapi di iteisana borathana kwa ga Molepolole
Kwa Letlhakeng 'phoko di thulana ka ditlhogo
Fa nonyane di supuletsang diphoko gone
Go tlhomilwe seolo sa ditshoswana
Tshoswane tsa masonya tsa go loma botlhoko
Tsa go loma di tlogela lebolela jaaka notshe

Kwa Mapharangwane go tlhomilwe seolo sa mabowa
Peolwane di nna di se lekola
Tshoswane tsa masonya di a se disa
Ka na diboko di ka utswa mabowa
Di itshema ke phoka nageng
Makololwane one a kometsa tsie
Fa e leka go ipagololela mogodu godimo.

Mokgosi re o utlule o sa le kgakala
Le namane tse ditona di itsetatseta
Di kgangwa ke mathe a a bothitho
Rona mo gae re ntse ditilo tsa dikgole
Re iteile kobo segole
Le dijo re di leka ka foroko

Mafatshe a kgothakgotha morwa Masire
Ba re o ba tsentse letshoroma
O tthatlhetse ditlhobolo kwa Mapharangwane
A ba garola dipelo a sa di laela
Le letsholo a sa le ntsha

Morwa Seretse o tlhomilwe tlhogo
A di phutha tsotlhe ka mefuta
Bokgobela bo ne a ba baya badisa
Bo A.K.47 a ba sikarisa makanyane
Majakgomo le letlalo la yone.

LEINA

Leina ga se mmalabadi
Le balabadiswa ke batei
Ba e reng ba go le naya ba bo ba bua
Ba balabala gore le lone le tswe mmalabadi
E re ka moso mong o bo o le balabadisa o le nosi
O le palama jaaka pitse ya mokatiswane
Go twe o gogwa ka ditsebe o re ga o tonki
Fa bo o sa matlho a bo a phatsima o kare a ntlole

Leina lebe seromo
Fa le rata le ya mareelelong
Mong wa lone a tlhoke boitshwaro
Le ba tla 'e ntse le tlhatswegile
Gore e re o le khwela re go eletse
O tshwane le bo Ketumile wa ga Masire
O bo o le huparele, o le kakatlele, o le somarele
Gore le se ke la tšhwamoga diatleng
La fela le go dule ka 'phatlha tsa menwana.

Fa o naya ngwana leina o le kakobe
O se mmitse motlhokagae
A tsoga a kaila le naga
Ga 'abo a tsoga a go kekologa jaaka maši mo bogobeng
Le wena motsadi a sa go gopole
O bo o nna ka go balabala ka pelo
Baloi ba tlhapadiwa ba sa jela motho kgomo
Wa sala ka nkabo wa morago.

Khunwana tshetlhana o ka mmita Montlenyane
O ka lakasela a tshwana le galase
Dikgomo 'sakeng tsa bopa
Bomalomaatsone ba itse go itatswa melomo
Ba metsa mathe a tlala ka legano
Basadibagolo ka ba kgalegile megolokwane
Ba itse go kgalema dikgadima
Pula yone ya na matsorotsoro.
Bašamaina ke a Segerika
Ngwana le sega'abo a se tshabele





E re gongwe le sefane diyathoteng
Le ene a kgoakgoetse jaaka makgowa
Leina le na le moro
Le reelelwa le tshware metsi

Leina le fa molaetsa
O ka tshola ngwana a go tlogela
Wa tshola yo mongwe wa mmita Mogomotsi
Mosetsana ene o mmitse Thato - ya Modimo
Ka go abo go ratile Ramasedi

BODIBA JO BO JELENG NGWANA WA GA MMAGO

E re o feta ka jone o bo kekologe
Gore e se re lotlhe la jewa ke dikwena
Mosadimogolo a sala a iphotlhere
E re o bo utlwa monko o tswe ka kwa go yang phefo
Gore e se re o sa ntse o sinaletse wa wela ka lemena
Fa o le motho o se ka wa nna ka kwa moweng wa leselo
Bagologolo ba re o ka tswa sematla
Ya re ka moso wa tlhoka maikarabelo.

O se ka wa kgatlhwa ke metsi go itsheka
Wa a kala ka matlho wa a nyenyefatsa
O tsaa gore a tlaa go ema fa mangoleng
E re o bo latlhela bofofu o ikgaphele kgakala
O bo tshabe lebaibai.

E re fa ditsala di go gogela teng o le botse phokoje
O tshabe ditlhapi tse ditona di ka go kometsa
Tsa go phuraphura marapo
Tsa go swaaswaa jaaka seswaa
Wa dirwa selalelo wa ba wa fetoga sefitholo.



MENO MASWEU



Tsala e re o e ruile o e beye leitlho
O mo dise jaaka kgomo ya sekoba
E re fa a bua o je tlhogo
O se ka wa goromela fela
Wa tla wa iphitlhela o le mpeng ya lefatshe
O kgarakgatshega jaaka namane e swetswe ke mmaayo
Wa ema ka leoto le le lengwe jaaka mokoko.

Meno masweu a bolaya a tshega
A go, kgaola mala o eme
A go berekela mo teng jaaka pilisi
O sa le le bolwetse ene a ile
Le ka leitlho a sa tlhole a rata go go lebela
A go leba ka tlhoro ya leitlho

Fa o robetse ka ditlhako, ke meno masweu
O ka go tobetsa le kwa bophirima
E re fa o tlola ene a sale a eme fela
A setlhafetse o kare naga ya leuba
A go thotheletsa tsina a sa rua dinotshe
Wa kgatlhwa ke go kgaphola
Wa okiwa ke monate jaaka ngwana
Fa 'tsatsi le fifala a tlhatswe maru
Gore bosigo bo fetoge motshegare.

Fa letsatsi le fisa ene a ye moriting
E re ka o jele fafi, wa ja korobela
Wa kgatlhwa ke go itatswa menwana
Ka o okiwa ke boladu o ka re ntsi
Fa marang a letsatsi a tlhaba
A tla go go fitlhela o ntse kwa sakeng
Le diphologolo o tshwana natso.

A tsene ka lenga la seloko morwa nkaikhuna
A jele rele wa sala o itshwere lehuma
Wa phadimoga le tletse mo tsebeng
A itshutlha melomo jaaka koko
Wa sala ka nkabo a tletse seroto.

DIKELETSO

Fa e ne e le dipitse rotlhe re ka bo re palama
Bontsi re ka bo re le kwa mankalankaleng
Rotlhe re ka bo re busa lefatshe
Kwa legodimong re ne re tlaa fitlha re tlhaelwa ke manno.

E ne e tlaa nna semphete ke go fete
Le bo“Omang” ba ipatla kwa pele
Ka diatla re ne re tlaa foforana meno
Mosuke wa teng o ne o tlaa beta kolobe
Ba ba sesane re ne re tlaa tlhaela
E re ka go ne go tlaa gatanwa jaaka marotse mo kgetsing.

Fa e ne e le bojalwa rotlhe re ne re tlaa goduma
Rotlhe re ka bo re le dinkgwana
Bontsi le bonno re ka bo re sa aga
Re ka bo re fetotse dibara malwapa
Rotlhe re le bagaka.

Tlala ene e tlaa rola hutshe
Dijo e le ntletsentletse
Diatla le mangole re ne re tlaa di oba
Ka re ka bo re kgotla fela more o bo o itirisa
Loso lone lo ne lo tlaa tlhoka balatedi

Bontsi re ne re tlaa ipata kwa madirelong
Ba ba neng ba tlaa sala kwa morago ke ba ba tlhaetseng
Le Modimo re ne re tlaa o fetoga, re busa lefatshe lotlhe
Borantshonyana ka bontsi re ka bo re setse re le
borankhibidu
Meriri ya rona e ka bo e lepelela
Fa e le ngwao yone re ka bo re e šobotlile ka dinao
Tšhomi yone re ka bo re e kgora rotlhe.



LORATO



Larato lo aga mo pelong
Lo itsheke jaaka metsi a mogobe
Mong wa lone a terenkege
A lo tshele jaaka maši mo nkgwaneng
Le nkgwana e bine dipina tsotlhe tsa lorato

Lorato lo bofitlha
Lo ka go ralatsa mafifi a bosigo
Lo go tlodisa dinokana di tletse
Le kwa ga mmagagoiwe o ka go ya
Wa susumela jaaka tlou e dupelela marotse

Fa lo sale monana lo boruma
Lo tšhotlhega ga bonolo
Le monate wa lone o busa moletlwa kwa masimo
O ka lo metsa wa lo ipeela mo kgetsaneng
Wa lebala gore lo ka tlhaga ka kgoro ya morago.

E re ka lo le matlhomatlho
Lo ineke naga ya diphologolo
Go tsoma tseo tse di mafura
Tse di dirope dikima go itsetsepela
Le tseo tsa dinama di phatsimang

Mmata a tlhage ka phatlha tsa menwana
O sale ka maritsa o se na momela
A dire magweregwere kwa kutung ya pelo
Le ramaranyane a tsiediwe ke ditshipi tsa gagwe
Pelo e apere letlalo la kgomo.

BOHUMI


Fa o bo batla o tshwanetse go nna mabogodika
O mele mabogo a mangwe
Ka a mabedi e le lemme
O lekane le dikala tsa mokala
Go tshwaratshwara kwa le kwa

Borre ba mabogo a babang
Ga ba na boitshoko
Ba tshwana le motlhapo wa maphakela
Fa nako di tloagantse ga ba beye lerago fatshe
O ka re motho a tlabetswe bogodu

Tlhogo le yone ga e bone boikhutso
Boroko le jone o bo goduma ka kopi
Borrabana le bana ga ba sa tlhole ba ba itse
Mosadi ene o sala mosalagae
O bona monna masigogare

Legaba la monna le ama pelo
Mong ene a sa le utlwe
Melelwane yone e nna sejo sa letsatsi
Le mafatshe a sele o a leka bokete
Fa ba korobetse o tsenya mmele otlhe
A huhumele jaaka kgomo e bona mabele mo tshimong
Le namane ya morago a sa e gopole.

Le go nna lekgwelwa motho ga a go tshabe
Kwa gae le ka ditoro a sa go gopole
A thanye fela lo le tsebeng
Legodu le setse le mo babotse
A itse go gopola kwa morago
Mokgosi o utlwale ntlheng ya borwa



BANA

Bana ke mamphorwana ba atlhamela babolai
Ba welawela fela le dinoka di tletse
Le setlhare sa mmitlwa ba ka se ralala
Ke dikonyana tsa Modimo ga di na molato

Bana ke baengele ba ga Jesu
Le dinoga di ba latswa fela di sa ba lome
Ba ka tlhakanela sekgwa le botau
Le bosigo fa go nkg a tšwerere ba a utlwa.

Ba re ngwana o itsewe sereto ke mmaagwe
Mme fa o ka belega dilala
Ngwana o tla a tswa mphowe
Ka o tla a jeswa le mašolobitla
A ba a nošwa le sopo tota

Ngwana ke mpho ya Modimo
E re o e newa o tseye ka tsoopedi
O iteye ka lengole fatshe
Ka fa o sa e newa o a bo o hutsitswe
O tla a gama o ikotelela
Balekane ba gago ba go je setshego

Gompieno ke sekwalejwale
Mpho e banana ga ba e tlotle
Ba e latlha jaaka diphofa tsa koko
Bangwe ba e swaetse pele
Ba e katele kgakala kwa tennyanaateng

Ntša ka go tlhoka maitseo
A ye go e gogela mo lwapeng
Dintša tsa puso tsone di tswe letsholo
Di late mogoga ka motlhala
Di tseye phefo go ya borwa.

Bana ke baboloki ba rona
Ke bagogi ba rona ba kamoso
Bokamoso jwa lefatshe
Baeteledipele le batlotlegi ba ka moso
Botautona le matona a puso.





MOLELO

Ke 'sepa le le sekeng le palangwa ke ntsi
Phuti e e tlhabelang ntlheng tsotlhe
E e reng batsomi ba e latile
Go se ke go nne le ope a e tshwarang ka lebele

O bosilo o sa bue
O marapo o se mašetla
Fa o peperetla o gaila naga le phologolo
Naga e fetoge pilo
Phologolo di fetoge molora.

Fa o kgalema le dikgosi di fologa ditilo
Bodišāše bone ba itsete ka megatla jaaka ntša ya mokgerwa
Fa o fetileng gone go sala motlhala
Malwapa one a tswalwe ka matlhaku
Bana ba sale e le dikhutsana
Basadi ba sale e le meopa

Fa o tlhasetse banna ba tsenwa ke mala
Bangwe ba huhumele dirala
Bodišāše ba tsene mo mapaing a bana
Kgosi di thatafalelwe ke tiro
Ntša tsa puso tsone di somoge direthe.

MADI

Madi fa a ne a lengwa jaaka letlhodi
Go ka bo go se kgomo ya boroko
Metlha ya leuba dikeledi di ne di tla a nosetsa masimo
Fa a ne a jewa ke dinonyane jaaka mabele
Bontsi bo ne bo tlaa swa ke dipelo

Bontheke ga ba a bone mantleleke
Ba dule bomabinagotsholwa
E a re go fetolwa pitsa mathe a bone a elele
Matlho a bone o fitlhele a lepelela
Ba godume mathe seboaboane
Di rethe di bina kwasakwa
E re pitsa e tsholwa ba bine dikoma

Fa motho a a tshotse kwete
O busa le bo mmanakanadiganong
A itse go nna setilo sa moretologo
Diboko di jewa e le sefitlholo
Madi le boladu di nne sešabo

Madi ka a se na pelo
A ka phunya phatlha
A wela ka mosima
Jaaka matlhare a setlhare
E a re a utlwa mariga a tlhotlhorege.

Ga a bonwe ke motho a a ja dinkonko
A tshwarwa ke monna a huhutse pele
A medile diphuka jaaka lemphorwana
Le mawatle a a paogantse pele
Dibuka tsone a sa di diegela
A suputse thotobolong jaaka tonki
E a re a inoga bodibeng a tseye phefo.

Madi ke moloi wa batho
Yo o se nang tsala le morwarre
A kgaogantse baratani
A lotlhanya malwapa
A ba a fetola dipelo tsa batho



NTLO

Pula e ne e na matsorotsoro
E gasa dikgadima le ditladi
Metsi a yone e le morwalela
Marothodi one a ikala makgabana fa fatshe
Ka tsena ka ntlo ka ikgara jaaka noga

Ga tsoga matsubutsubu
Ditlhare di robega dikala
Mmu o apesitse le loapi
Diphologolo tsa bo nthekge tsa sugakana
Ka tsena ka ntlo ka iphalotsa

Fa go kaologa sebanga sa tsena ka kgoro
Ka se apere baki ya batlotlegi
Sa ipega boeng
Ka bitsa moja ditlhogo
Ra tsena ka ntlo ra tšhotlha kgang

Ditsala ka di ntshana seinong
Ra dira moletlo bokopano
Dijo e le ntletsentletse
Dino tsone ya bo e le tsena o itseele
Ra tsena ka ntlo ra keteka.

Mahutsana a nkapara
Matlho a tlala dikeledi
Tlhogo ya ema tsi!
Ka tsena ka ntlo go ikgomotsa.

TLATLANA

Tlatlana ke mosadi wa Setswana
Tlatlana ke letshwao la bosadi
Mosadi wa Setswana o bonwa lapeng
Kwa segotlong sa mabele mabelega batho

Tlatlana e tlotla mabele
E aga seriti sa mabele
E a tlotlomatsa go tswa kwa tshimong
Go a isa kwa bogwegadi
O khubame go kopa kamogelo

E a re go roba tshimo o bapise tlatlana
Dinawa le tsone di go botse dipotso
Manoko e re fa a thujwa a lelele tlatlana
Fa o rwalela bana magapu diatla di itatole
Kgetsi yone e beye magapu magetleng
Tlhogo e sale e hunyetse jaaka ya ga khudu
Tlatlana ya bo e le one molemo.

Basadibagolo ba sule mekwatla
Ditshika tsa melala di setse di gagametse
Go tlhaba ba konela go ba bolaile matlho
Ba obama jaaka thutlwa e e nwa metsi
Ba ipela ba tlotlomatsa lelwapa.



MOSOKELATSEBENG



Aheelele lona borankhubidu
Ga le a re le itse go tlhama
La tlhama mebotoro la tlhama bommamoleana
La ba la tlhama le sebokolodi sa diporo
E rile borantshonyane ba sa ntse ba tšhotlha dinkonko
Ba orile molelo wa mariga
Lona la tsaya tlhale la loga malepa
La tsaya megala la iketsa segokgo.

E rile ka sethoboloko borantshonyane ba suta molelong
Ba ne ba re ba nna moriti o tsididi fa phala e lela
E rile ba re ba rwala dipeke le dikepu
Ga twe nnyaa! metlha ga se ya maloba
Le bone ba itse go bofaganya meja ya thari
Rona ka re sa le banyana re tla ka mathuensikisi
Le bokorwe go itaa mogala

Dumelang ka koo Bakwena betsho
Bakgomong re sa ntse re tsogile
Le rona ditlhabololo di a re gopola
Re agile matlhatlaganyane ra kgabisa ka dithunya tsa diolo
Re gata fa tobe-tobe ga rataro
Ra itse go botsa matsogo re le kgakala.

Mantswe a rona a fitlha golo re sa go itse
Mafatshe a selekane re a kopantse
Re kgaotse mesepele le dikwalo
Tsone di ka re latsa ntle
Mosokelatsebeng o itaya patla fela
Metsotso ya mosepele e felela mo lenaleng

Fa ke ka bo ke na le nomoro ya legodimo
Ke ka bo ke iteela Morena mogala
Ke re bana ba thari e ntsho re a nyelela
Re fe pula re kgalegile, gore re kolobetse dikgokgotsho
O bo o re fe botlhale
Gore le rona re tlhame maranyane.

DIKHWAEARE

Phalane paoganya tsebe di pharame
Masigo a simolole go bereka
Diphala di simolole go goloketsa
Mo malwapeng, mesamong ba thaakanye ditsebe.

Melodi ya tsone e ka go latsa ntle
Go ya ka botsipa le bokgoni
Ba tsamaya ba kopa dithebenyana
Go tlamakanyetsa la motlotlegi Morena
Go kgaoga ga ngwaga ya bo e le go papiela.

Ka maneele a dikonyana tlhako e a lela
Bonkotwane ba khukhutha kwa morago
Bonkwenkgoga ba di goga kwa pele
Ba dipitse ba lebe ba dinao
Nonyane tsa lefatshe di bopeletse.

Fa di goroga o ka leba ka 'itlho le le mosoka
Ba re moeng goroga malata a kgosi a ntshe marago
Fa di thulana o metse mathe kgapetsakgapetsa
Mphatlalatsane a tlhabe ka mašetla
Go longwe melomo ya tlase
Lemina le lone le sitwe ke go tshologa
Fa le nkgale le se keng le gana go tswa
Dikgong di kue mosi
Disikalala di lekane bolelo
Dibetlela tsone di oketse motuka le magala.



MAGAPU



E rile kgwedi ya Mopitlo e re kgo!
Ba le bantsi ba thwantsha menwana
Thaka e tshesane ya bo e sa fetse go rumaruma
Fa e ya fifing bontsi jwa tshikinya dinama
Morolo o mosesane wa mela marama
Motho wa teng e kete katse e hupile madila

Kwa ntlo-sephiri maina a bidiwa phetelela
Ba mala a a bokete ba bo ba bone monamodi
Ba mala a masesane bone ba tsenwe ke tsebetsebe
Bogaketlhophe bone ba fetoge bopeba
E re ba boa kwa lesunyaneng ba tlogele dithotse
Masimo a maša a runye kwa lesung

Khunwana ya ga MmaKhunou
E e reng e goroga dijo di bolele mo matlong
E imolole bopitsa morwalo
Ba ba 'nala di bokete ba letse legofi
Bo-fa-di-sa-fele-ga-re-kgore le bone
Ba bone ba ikimetsa morwalo
Tshetlhana ya ga Mmatshetlho
Yone e ratwa ke matlhogoputswa
Ka ba re bohibidu ke kotsi

PHANE

Diboko di apere lefatshe ga di jewe
Mme nna ke jewa le ke batlotlegi
Le methamo ya seboko ga ba e bone
Ba mpona legano le a kua
Bontsi bo nthata ke le segwapa
Fa ke le setlhareng ke sereto

Ngwaga mongwe ke tla ka mabetwaepelo
Ke tlogedisa banna le basadi malwapa
Bana ba sale e le dikhutsana
Le fa pula e porotla dikgweng ke dinyana
Ditlhare le mesasana di fetoge dikhukhumo
Mosimane letswai ene a bereke phetelela

Sebe segolo ke a sokola
Ke sotlega jaaka mogami a ikotelela
Loso lwame ga se lo lo ka gorosang ramaotomabedi kwa
legodimong
Ka ke gamolwa mala ke rototse matlho
Fa ke ntsha leitlhonyana ke lathelwe mo pitseng
Go iteelwe dikgong le molelo
Poto ka a le lefufa a gane ke iphalotsha

Thekiso ya me e kwa mankalankaleng
Dijanaga di huhula marago jaaka pitse e tshaba ditau
Di gobe masigo a rwele o kare sebokolodi sa diporo
Batswana ka go rata madi madiga dipelo
Ba ntlofase boLimpopo ba tletse
Ba nthekisetsa bonkhibidu
Bone ba itse go ntshwaya, njo ya bokgomo.

Fa ke goroga nama e fologa setilo
Go ronang le tlhoro e e rola
Ka ke le mohumigadi
Ke tsere menontshane yotlhe ka e ipeela
Gore ke iteisane borathana le boborotho
Ka e le bomagogošane ba itsete ka megatla
Ba sutele nna phane morena wa bogobe.



KOKO



Nna wee! moratwa ke batho
Malatsi ame a badilwe mo lefatsheng
Ramaotomabedi ga a ntlotle, o tlotla nama yame fela
Ka monate wa yone o na le kgogedi
Tlhogo yame e kgaolwa jaaka ya setlhabelo
Diphuka tsone o dira mosamo
Ruri ke jewa le tlhako le tedu tota.

Ga twe moeng goroga dijo di bonale
Koko di kgaoge ditlhogo
Malata a tle a itatswe menwana
Ka bone ba itse sopo, dinao le tlhogo fela
E le fa ba jele koko
Barena bone ba retologa ka setlhana
Ka e le yone njo ya baeng le dikokobolo
Bana bone ba konkobetswa ka sehuba
Ka e le disuma, go twe di ka kgama bagolo.

Ke nna mong wa mekete
O tsena ntlo le ntlwana o tla fitlhela ke le moeteledipele
Mothusi wa me ke seboko se sesweu
Barongwa ba gagwe ke boladu le madi
Fa re kopane boreletsana
Le badula setilo ba bintshe monwana o motona
Bana ba ikgate menwana ya dinao
Ba rapele thapelo ya masalela
Ka bone e le bokokona.

MMANGOLWANA

Nna ke maetla-a-bobola
Matsamaya-a-kgarakgatshega
Maje wa kwa maphokeng
Ke gautsa mosadi le bana
Mme bana ke ye go ba latlhela kwa moseja
Mosadi ene ke mo kometse jaaka phiri

Mosimane wa kwa mankalankaleng ke a mo rata
Fela o ntsenya dingalo
E a re fa a tla a kgokologa le dikgwa
Tloloko ya gagwe e nkiteye tsebe
Fa a tla gore po; ke tsholetse maburabura
Gore ke se gotse pela
Ka tsoga ke utlwa go boletwa.

Mogang makgonatsotlhe a iteleketseng
Legalapa lame le leletse bana ba kgosi segaba
Le nna ke je mokaragana jaaka nthula
Ke itse le go tsemelwa ke se mmalapa
Pelo ka go tshwakgoga
E ka go diga ka sekota jaaka mopakwana wa selemo.

Ba ba nkitseng ba mpitsa matšhotlho wa mankalankaleng
Mme 'go ntshwenye mo pelong
ka ke le malala a otlala
Kgaitسادie modimo-o-nko-e-metsi
Se olaola magola

Fa lefatshe le letsa megolokwane
Le nna ke itaya legofi
Ga re matlhogotshweu a itse go boka
Ba re ke mmatshweu theletsana
Ga a tshabe go ralala kgokgotsho





Fa ke tsena mo mosong maputswa a a nyenya
E re ka ke tsamaya le ditshika
Kana ke tshwana le mmanakanadiganong
Ke kamakamile ka oomabedi
Go sitang le 'namane tse ditona bosesuma ba ntlotla.

Ka re nna mmabatho ke a belega
Mmatshweu ga a latlhwe jaaka ntša e sule
O jewa le legogo
Nna ke jewa le tlhako le tlhogo tota
Letlalo le alwa ke bonkuku
Bommankateng bone tlhatswa o loke letswai
Latlhela mo pitseng o tle o itse go itoma loleme
O nje o bo o nje le bana

KATSE

Dikhutsana di tletse le lefatshe
Mme nna ga ba mpona
Ke tloiswa matlho fela
Le fa ke re ke a ngaola
Ke re gongwe mongwe o tla a ntswa matlho
Ke tle ke bo ke itshela ka metsi a bela.

Rramaotomabedi ka lefufa
O ntlhaola le re agisantse
A neele ntsa setshwaralegaba
Nna fa ke re 'ngao' a nfake butse
A nkobe jaaka ntsa e phintse
Mme a ntathele mo letloleng a re ke mo tswe thuso
Ke mo namole dipeba.

Lobese lone ga ke sa tlole ke lo itse
Le ntsa ele lone njokgolo yame
Ke a utlwa ka monko fela
Ke a bona fela fa a kgotletse ke ntsi
Ke raya fa dintša di ile letsomong

Ke leka ka thata ya lentswe
Le namane tse ditona bonoga ke a ba thula
Ke leka go ithapelela
Mme ke tshololwa jaaka metsi a metseto
Ke maja go jelwe
Bangwe ba re ke kokona

Masa a sele morwa tibe
Iphe botlhale jwa ga mmutla
Le fa bontseane le bone ba iphalotsa
Ke itshoboloka ke iketsa nkaikhuna.





Fa e le kwa ditoropong tshotlegokgolo
Ke mmananabela wa masigogare
Motshegare ke kgaoge tlhogo
Matlapa a tle a mpoledisitse
E kete ga ba bone ke morwa ketlaaitheng
Bonkhubidu bone medingwana yame
Le dikhenekhene ba ka ntatlhelela
Mme fa e le ntsa ene o fitlhele a roromisa marama.

RE LATLHEGETSWE

Petlwana e a itooletswa
Gore e se re o betla molamu ka yone
Ya o kgomotha fela
Batho ba tloga ba re o nala di boleta
Ga o ka ke wa apeela bagwagadi dijo
Ka ba le mabifi ba tloga ba feroga dibete

E rile ke mo leba a nkgasa ka monyenyo
Ka gopola Motswana yo o rileng, "... le ojwa le sale metsi"
A ba a re, "Moremogolo...
Kgarebe e e fuka lesweu
Ya go ka eletswa ke nonyane tsa loapi
Marama a maswaana, boreletsana
Mosetsana wa tsopa la seAferika
Ka bonolo o kare konyana.

O ne a amogela ka tsoopedi
A iteye ka lengole
A re 'nxa' a kopa maitshwarelo
Le makgwamaši a a obele lengole
A itse fa tsela e e se nang disana e ithemelwa.

Tšhomi o ne a a ja a ba a gore sejana
Tsa maranyane le tsone o ne a di iteela
Ere e, ka e sa kgaoganwe bonthekege re sale fela
O ne a susumela jaaka poo e batla metsi
Le kwa Mmadikolo o ne a tsositse setsuatsue
Fa a fetileng teng go sala phefo e e tsiditsana

A jewa ke metsi a se nang pelotlhomogi
A mo kometsa jaaka kwenya ya madiba
Ba mo felegetsa fatsheng la iketlo
Matlho a rona a tlala dikeledi
Pelo tsone tsa hupa botlhoko
Ra opela dihela tsa Sione
Ra lopa yo o re neileng



PHILIP MOKGANKGARA MOSHOTLE



Ke namane ya kubu
E e tshelang ka go selasela botalanyana
Yo batšhomi fa ba tšhoma ba re ke 'Thwentlele-
Thwentlele-Letlele-Setaa'
'Master of diparamparaa le meropa.'

Setilo o nna sa moretologo
Ditshipi ke tsa gagwe Mokgankgara ka sebelebele
O a di itse le tsone di a mo itse
O ditshwara ka diatla tse di tshweutshweu twaa!
Mosimane wa moArch Bishop.

Ke phorogotlho e e reng e tsena e re
Ke moeti ke le tseleng
E dumedise kgosi
E bo e dumedise le malata a yone
Barwa le barwadie kgosi le bone a sa ba lebale.

Kwa Mmasemenyenga le kwa Kgaphamadi o ne a ba lekola
Shashemooke, kwa motsing le kwa tshiping e nala o ne a
ba gopola
Le kwa Shoe-shine kwa Shoshong o ne a ba botsa matsogo
A itse go khubamela Barolong ba ga 'abo
A botse pula kwa Matsiloje.

Ke rragwe bo dibeibisi le bo di boisi
O ne a jela mo mogopong o le mongwe le bone
Mosimane wa kwa Zim.... kwa go elang maši le dinotshe
O se thakga jang Rakotoleakgwetlha o ne a e babola
Seromamowa sone e le sa Botswana
Se se gasang go tswa motsemogolo Gaborone

SERETSE A GOROGA A TSWA MOSEJA

Tlapa le kwa thabeng boreletsana
Balepalami ba ole ka dikota
Lo a ba itse
Ya tsena ka Botalaote Khunou
Banyana ba tsholediswa phetelela
Go twe tlang lo bone phuthaditšhaba
Mafatshe otlhe a a mo itse.

Ke khunou yoo-ra-Khama
Tshukudu le Matsoga ba a mo itse
Ke khunou e e lenaka le molema
Ga e a tlhokoletsa go tlhaba tse dingwe
Ka naka la yone le le bogale
Fa e ka tlhaba go ka senyega.

Kana mo ga Mmangwato kgang e letse mo Makgaseng
Mo Malekantweng go innetswe fela
Go itshamekelwa bolo le bana ba makgowa.



BABIRWA



Ke ditlhapi tsa metsi
Tsa dinoka tse ditona
Tse di thumang mo Motloutse, Limpopo le Shashe
'Tlhapi tse di tlhalefetse kwena
Tse e a reng go e bona di nwe moro wa tibe

Ke Babirwa ba ga Malema
Wa namane tse di diobe
Tse di putswa tse di mabifi
Tse di lemileng jaaka dikgomo sakeng
Tsa go ka tshabiwa ke bagaka

E rile go tlhophiwa diano
Tsa supiwa ka matlalo
Monnamogolo a kgetha la nare
Matlhalerwa a tsholola mathe
Ka ba rata go loka letswai thata

Ke Babirwa ba modole le motshe
Ba mabele mabelega dirathana
Ba gore pula e duma ba sifasifa ka dipeo
Malema ka tonki mmelega morena
Masia le pula ya sephai
Ke batho ba kgomo le temo
Ba molamu le mathale
Babirwa ba selepe le kepu

Ke batho ba kgomo le temo
Ba go tswa le kgomo sakeng
Manwa maši ka kgamelo
Matlhalerwa makometsa nama
Maja kgomo le dirwe

Babirwa ba molamu le mathale
Batsomi ba tlou le mmutla
Ba bolae ka molamu le tlhobolo
Magobeya le naga ba sa e aga
Ba itse go tlholela mathale

Babirwa ba selepe le kepu
Ba go rema matlhaku ba tsosa masimo
Ba gubudi masimo go lengwa
Mapako o ne ba a epele go aga masaka
Babirwa ba ga Malema kwa Molaladau.



MAMA



Ke raletse dikgwa le dipoa ke sa rongwa
Ka ya go wela kwa Boteti ka ja tlhapi
Di ne di befile namane tsa motlhaba
Go pannwe tse tsetlhana le tse tsetlha
Ka fitlha ka tsame le nna ka rwesa majokwe
Tsa bopa di sena go fitlha kwa maromolong tsooraTeemane

Tsa tšhematšhema tsa wela molapo
Jaanong tsa itse go tsenya tlhogo mo bodibeng
Tsa goduma ka iketlo
Ka ga twe lepotlapotla ke la basimane
Di ne di tla di tsaya mowa
Di iteisana borathana le bonkete kwa mabaleng a dibolo

Ga twe ga di ke di etelelwa ke manamagadi
Ene o ne a tsenya tlhogo le magetla Mama
A di kubetsa go tlhola bokoa
O ne o ka mo tlaetsa matlho
Fela o ne a tshikhinya dipoo
A di tsenye phatlha le phatlhana gore di phoke lehulo.

Ruri botho bo tsalwa le motho
O ne o ka ithoma ke mme
A mpepa ka thari ya meja mene
Ke motlhaba ka dikolamolora ka fa mokwatleng
E re ke lela a nkunkuretsa
A ba a nthuta puo

Modimo kana o nkonkome ditse
O ntseetse sethunya makgabisa naga
Ke ithoma o se nneetse
O jelwe ke metsi a se nang pelotlhomogi
A mo kometsa jaaka kgogomodumo
Ya se ka ya nna ja o ntshiele
Ga sala fela thotse e iseng e thunye.